



*Jumat, 19 Januari 2024*  
**Ogen : 2 Raja-raja 4: 29-37**



**Ngaloken Tanda Sengget**



**M**egiken kalak-kalak si mere kesaksian meriah nge akap. Lit deba nggo sakit menahun, dokter pe nggo angkat tan tapi tupung ia ertoto la erngadi-ngadi maka pinakitna ndai nggo malem. Lit ka si enggo setahun i PHK, nakan pe lanai lit janah nggo kelihen sada jabu, tapi kenca dung ia ertoto lit kalak reh ku rumahna e me temanna mbarenda maba sen ras beras man dakanenken. E dua contoh denga, janah mbue denga contoh si deban. Payo nge kita ngarapken "keajaiban" lalap terjadi? Payo nge Tuhan terjeng erdahin arah "keajaiban"? Tupung jantungnta erdetak denga, tupung kita ngasup denga erkesah, tupung naheta banci denga mabai kita erdalan, tupung kita banci denga ngenanami kiniersadan, la kin Tuhan pe erdahin alu rejjin?

Tapi megati kal siniarapken kita maka tanda sengget Tuhan e lit ras jadi bas kita tupung lit kiniseran, mara ras sura-sura peratenta jadi min. Adi siperdiateken diberu si bayak i Sunem nari, ngaloken tanda sengget i bas Tuhan nari maka ipupusna anak dilaki. Saja ngenca tupung kitik denga anakna, maka mate me anak e. Nina diberu e man Elisa, "Ma labo mbarenda kupindo anak dilaki man bandu? Ma kukataken pe ola bereken arapen man bangku? (ay.28).

Tapi erinisiatif Elisa guna ngamparken bana i babo anak e dingen ertoto. Jadi me tanda sengget; anak e keke ras nggeluh mulihi, erkiteken kuasa Tuhan. Manusia ersura-sura tapi Tuhan si nentukensa. Sabab toto labo alat guna maksa Tuhan nehi sura-suranta tapi pengendesen dirinta ku kinidolatenNa ras kuasaNa. Tanda sengget Tuhan pasti lit tapi labo bagi peratenta sabab e me si kerajangen Tuhan. Kita terjeng erpengendes man baNa guna kai si ateNa iberekenNa man banta.

*☞ "Tanda sengget guna pepaguhni kiniteken kap"*